

Pujortartarnek nunatsinni peqqissutsimut annertuumik sunniutipiloqartaqisoq qanoq annikillisarnerusinnaanera pillugu apeqquteqaat allaavingalugu siunnersuut.

(Inatsisartunut ilaasorta, Aqqalu C. Jerimiassen, Atassut)

Akissuteqaat

(Peqqissutsimut Inunnnullu Innarluutilinnut Naalakkersuisoq)

Matumani pineqartoq pingaarutilik pillugu apeqquteqaat allaavingalugu oqallinnissamik siunnersuuteqartumut qujanaq.

Pujortartarnek ukiunik inuuffigisassanik ikinnerulersitsissutaanerpaasartunut anigorsinnaanngisamillu nappaateqalissutaasartunut ilaalluinnartoq, ilisimatusarluni misissuinerup takutippaa. Pujortartartut pingasuugaangamik marluk tupamik atuinermik allaavilimmik nappaateqalersarsimanertik toqququtigerataannaavaat. Nikotinilinnik atuineq uummalluuteqalernissamut, eqqarsartaatsikkut akornuteqalernissamut tarnikkullu nappaateqalernissamut, soorlu annilaangasalernissamut isumatsassimangaalernissamullu inuusuttut akornanni aarlerinaateqarnerulersitsisarpoq.

Nunatsinni inersimasut affaanit amerlanerusut ullut tamaasa pujortartarput. Naartusut ilarpassui pujortartarput atuartullu angajullit affaat sinnerlugit nikotinilinnik atuisuullutik. Tassa tupamik nikotinilinnillu allanik atuineq inunnut ataasiakkaanuinnaanngitsoq inuiaqatigiinnulli tamanut akornutaavoq. Meerartavut alliarnerminni isumaqartarput, pujortartarnek nalinginnaasusoq. Tamanna pujortartalernissaannut aarlerinaateqarnerulersitsisarpoq.

Meeqqat inuusuttullu qaqugumulluunniit pujortartalinnginnissaannik nikotinilinnilluunniit allanik atuisunngunnginnissaannik qulakkeerinnineq, pujortartalernissamik nikotinilinnillu allanik atuisunngutsaaliuinermik suliniuteqarnermi sunniuteqarluarnerpaasinnaasunut ilaasoq, Naalakkersuisut isumaqarput. Tuluit Nunaanni kulturimik politikkikkut allannguerujussuarnissamut inatsisitigut aalajangersaasoqqaqqammerpoq¹. Tamanna tupat nikotinilillu allat kinguaariit tulliinut tuniniagaqqusaajunnaarsikkiartuaarnerisigut, nioqqutaanerannut malittarisassat sukannerulersinnerisigut pujortartarunnaarnissamullu tapersersuinerunik angutserniarpaat.

Tapersersorneqarnek pujortartarunnaarnissamullu nakorsaait pujortartarunnaavinnissamut periarfissaqarnerulersitsisarput, pujortartarunnaarsitsiniarnissamullu aningaasaliineq peqqinnerulernissamik suliniutini imminut akilersinnaanerpaasunut ilaasoq aamma uppersarluugaavoq. Pujortartarunnaarnissamut nakorsaasiisarnek Kalaallit Nunaanni Peqqinnissaqarfiup peqqinnissakkut sullissinissamut qitiusumik maanna neqeroorutaanut ilaanngilaq. Inuunerissaavik Steno Kalaallit Nunaat pujortartarunnaarnissamut ornigulluni attaveqaatitigulluunniit oqaloqateqarnissamik sukkornermik, KOL-imik imaluunniit aap naqitsineranik qaffasittoornermik nappaatilinnut neqeroortarpoq. Oqaloqateqarnissamik pisariaqartitsisut amerliartorput.

Innuttaasut pinngitsoqaratik sivisuumik peqqissumillu inuuneqarnissamut pitsaanerpaanik periarfissaqartinneqarnissaannut tunngavissanik pilersitsinissap qulakkeernissaa

¹ <https://www.gov.uk/government/news/tobacco-and-vapes-bill-becomes-law>

pingaartuuvoq. Taamaammat pujortartarunnaarnissamut tamanut ersarissumik neqeroruteqarnissaq qulakkiiginnarnagu tupat nikotinillillu allat pillugit inatsisip nutarterneqarnissaa aamma qulakkeertariaqarparput. Inatsit taanna nunani tamalaani ilisimatusarnernik pitsaanerpaanik, kingulliarsunnut kinguaariinnullu tulliusussanut isumassuineramik nunatsinnilu inuiaqatigiit peqqinnerulernissaannik anguniagaqarnermik tunngaveqassaaq.

Taamaammat pitsaaliuineramik suliatigut pitsanngorsaaniarnerup, naartup pisinnaatitaaffiitut tunngasortaqaarnissaata oqallisiginissaata isumaliutigiginissaa tulluartsorinarpoq. Tassa naartup tupamit allanillu soorlu aanngajaarniutinit innarlitsaaliornissaanut qanoq iliorutta pitsaanerussanersoq. Pissutsinik allanngueqataarusulluinnarutta kingusinaartigata iliuseqalertortariaqarpugut. Naartup inunngunnginnerani iliuseqartariaqarpugut.

Naalackersuisut taama oqareerlutik pujortartarnerup qanoq annikillisarneqarnerusinnaanerata oqallisigilluarnissaanut qilanaarput.